

Abdulah Kapetanović, geod. ing.



Abdulah zvani Kapetan rođen je u Kapetanovićima kod Višegrada 11.12.1932. godine, od oca Muje-Mustajbega i majke Mejre, rođ. Salić. Završio je Osnovnu školu, malu maturu u Partizanskoj gimnaziji 1947. godine u Sarajevu. Geodetsku srednju tehničku školu (GSTŠ) u Sarajevu pohađao je od 1947. do 1952. godine. Od 1943. godine bio je smješten u Đački dom Mladen Stojanović do završetka srednje škole. Po završetku srednje škole, radio je kao nastavnik u GSTŠ, zadužen za geodetski instrumentarij i obavljanje terenskih praktičnih vježbi. Državni stručni ispit položio je 20.04.1956. godine i dobio stručni naziv geometar.

Na Višoj geodetskoj školi u Sarajevu je vanredno studirao od 1961 do 1964. godine i dobio stručno zvanje geodetskog inženjera. Stupanjem na snagu Zakona da nastavnici moraju imati visoku stručnu spremu, radni odnos je zasnovao u Zavodu za urbanizam grada Sarajeva. U to vrijeme, kao politički podoban kadar, određen je na iskolčavanje tajnog vojnog podzemnog Aerodroma Udbine, lociranog između Bihaća i Knina, što je u to vrijeme bila strogo povjerljiva tajna. Potom je radni odnos zasnovao u Skupštini grada Sarajeva - Sekretarijatu za urbanizam, do formiranja Zavoda za izgradnju grada Sarajeva 01.09.1975. godine, gdje je radio u Sektoru za katastar komunalnih uređaja, kao samostalni referent za telefonske instalacije. Tu je ostao do prijevremenog penzionisanja iz zdravstvenih razloga, a odlikovan je Ordenom sa srebrenim vijencem.

Od mladih dana je primljen u komunističku partiju. Bio je aktivan u društvenom i političkom radu, principijelan i dosljedan u ideološkom opredjeljenju i pravedan. Imao je dosta smisla za kreacije od drveta. Volio je djecu, pa je uz vikendicu vrlo estetski sagradio dječji zabavni park. Bračni život proveo je sa suprugom Hanumicom, rođ. Branković, sa kojom je imao troje djece: sina dipl. ing. građ. Reufa, drugog sina dr. medicine Fuada i kćerku dipl. pravnicu Amru. Do početka rata u BiH 1992. godine sa porodicom je stanovao na Grbavici, kada je sa porodicom izbjegao na drugu stranu Sarajeva preko Miljacke. Tom prilikom je ostao bez imovine, kada mu je stradala i sva dokumentacija.

Umro je 05.10.2008. godine od teške bolesti i sa izričitim zahtjevom sahranjen na ateističkoj parceli, što je uža rodbina ispoštovala. Po želji rodbine, posmrtni govor je održao Alija Dolovac.

Alija Dolovac